


郁

樓



詩

虞忠著



詩者，涵養性情之本也，必其人心氣和平，學養深醇，誠於中者形之外，發為詩歌，方有合於溫柔敦厚之旨，可以傳世而行遠，近數十年，西學勃興，莘莘學子，率皆厭故喜新，文尚白話，詩宗新體，循是以往，非惟風雅道喪，典型失墜，而世道之凌夷，人心之澆薄，社會風俗之江河日下，胥可於此覘之矣，我友朱君仲璋，固一心氣和平學養深醇之君子也，不幸今夏以微疾沒，其哲嗣肇祖攜其遺集郁樸齋詩稿來云，此固先人僅存之手澤也，將付梨棗，敬乞一言以弁卷端，余與仲璋訂交之始，在光緒己亥，應試嘉郡，同列高等，壬寅同舉於鄉，癸卯同赴公車，辛亥國變後，同官財部，同事交行，先後歷廿餘年，君之為人，勤勤懇懇，人咸樂與之交，歲癸酉，余創議修烏青鎮志，浼君與武進張季易君同任纂修，書成，頗為時賢所稱許，乃君

於編志餘暇，輯有雙溪詩話，舊聞逸事，不獨可補鎮志之闕，且其搜羅豐富，評騭公允，非深於詩學者不克臻此，余甚佩之，然其時余固不知君之有詩稿也，君亦從未以此告余，今以肇祖之來請序也，始受而讀之，冲澹夷猶，灑然自得，詩格與樂天放翁為近，深有合於溫柔敦厚之旨，可以傳世而行遠矣，抑余尤有感者，君世居濮院鎮，距先哲竹垞太史之曝書亭數十里而近，是以流風所被，代有聞人，其與君同時濟美者，有如夏君頌椒劉君龍伯張君劬生，類皆文采斐然，互主壇坫，余雖不文，亦常買棹與會，相與盱衡今古，慷慨論時，迄今三十餘年，曾不轉瞬，而流風餘韻無復存者，且世變愈亟，莫知所屆，序君之詩，蓋不勝黍離麥秀之悲，正不獨睠念故人，為之泫然流涕不能已已也，爰書所感，歸之肇祖，其永寶之。

中華民國二十九年十二月年愚弟盧學溥謹序



國家圖書館



002577392



吾年十九，為計曹郎，得與秀水朱君仲璋同舍，因締縞紵之交，維時海內大亂始戡，士大夫以器競相尚，尠有事學問者，而吾儕乃不恤鑽研故紙，鑿險鯁幽，以自取怡悅，若京兆張君霈青武進張君季易醴陵黃君蘭蓀吳江陸君賡南湘潭陳君端生尤佼佼者，署故有海棠數樹，為百餘年物，高過屋檐，逢春作花，掩映月廊，雅有縞袂仙人悠然遺世之想，同人慕焉，爰以棠名其社，吟詠嘯歌，興弗稍輟，迨觀常熟孫丈師鄭而吟事益盛，閒或及於譚藝，每集則羣屐翩然，崇明金君任君同里王師福庵皆羅入飲真之社，外此羣彥來相切磋者，蓋不勝僂指，仲璋藻思電發，諧趣雲橫，往往傾倒四坐，座無仲璋，客亦無歡也，歲戊辰北都撤治，吾儕至此遂賦分飛，顯晦各異其趣，吾既奉母歸隱於市，仲璋則似王粲之依劉氏，以研耕所入，贍其室家，師鄭丈

暨賡南端生並後先殂落，愴怳前游，曠如隔世，邂逅歔歔誠不禁有天
上巢痕之感已，丁丑國變，兵燹被於西浙，吾與仲璋咸困跡鄉閭，音
問罕達，及事稍定，各走海隅，吾已為鮮民之身，鋒鏑孱魂，相見驚
喜，仲璋須髮皤然，吾亦與時顛顛，不復更有嚮日之逸興，今秋聞仲
璋有去滬之思，俄嬰腸疾，遽捐館舍，引悲氣類，興念家邦，真不知
涕淚之所從出也，仲璋有令子，曰揆初，材雋克肖，含恤中以書抵吾
，謂檢遺篋得郁樸齋詩三卷，中多與吾倡和之什，泣請為敘，嗟夫，
得生為士，澹泊自甘，其人已覺可念，矧又躬邁世變，馴至鬱鬱以殉
，詎不尤可悲耶，雖然，塵軀脆薄，壽至百年，亦終有盡時，生死憂
樂，良亦無擇，士之所貴，貴能以載道之文，傳於奕葉耳，仲璋之詩
與文，涵孕萬象，自有其可傳者在，寧待吾之辭費，特有感於理亂之

乘除，交親之聚散，悠悠大夢，何日能一豁吾之醒眼乎，吾交仲璋垂三十年，此三十年中之所遭際，波譎雲詭，演幻無極，又豈僅恃區區之文字所得狀寫豪末，姑書此以報揆初，冀稍塞其不匱之哀思而已，敘云何哉。

庚辰大寒前一夕杭郡愚弟徐行恭謹敘於滬西愚谷僑居



嘗聞古之人千里神交，所謂思之思之，精神通之，往往未見其人，先見其詩，如昌黎之賈賈島，山谷之與晁无咎也，而余與仲璋則不然，相交垂三十年，始得受其詩而讀之，蓋仲璋與余雖同里閭，而其游庠也晚，後余者幾十年，僅因余弟蔚文識君於黃公爐畔，蔚文嗜酒，君亦善飲，故相稔也，迨丙辰歲，同官春明，乃稍稍往來，而君曾作汴游，余亦時時南下，是以接近猶少，乙亥余在審計部，君來同事，几硯與共，氣誼尤孚，每見君手不釋筆，所抄唐韻白香詞譜，於註釋務極其詳，而陽平陰平可平可仄之字，一一加以符號，余益佩君之勤劬縝密，致力於音律者深，顧詩仍未之見也，丁丑變作，吾兩人挈眷倉皇離秣，比抵里，以滬南道阻，乃相偕至濮院，託君宇下，得一椽之覆，是時固已由文字交進而為患難交矣，避亂梅花涇上，達兩閱

月，居恆無事，輒從君借書消遣，一日君忽手郁樸齋詩稿授余審定，詩凡三卷，自少而壯而老，山川之所經歷，友朋之所往還，胥於是乎寄之，余昔嘗讀先德詠裳先生紅籐館詩，字字珠璣，洵為金華殿中
人語，而君則溫文爾雅，詩如其人，披閱既竟，略有抉擇，持以歸之，因詢以郁樸何義，君笑不答，嗣讀王充論衡有云，物實無中核謂之
郁，無刀斧之斷者謂之樸，文吏不學，世之教無核也，郁樸之人，孰
與程哉，如君家學淵源，言皆有物，乃猶自謙若是，謂之何哉，君既
歸道山，哲嗣將壽之梨棗，屬言於余，不敢以不文辭，爰述我兩人交
契之始末，卽以為序云。

中華民國二十有九年冬同邑七十叟愚弟沈定九謹序

郁樸齋詩卷一

秀水 朱辛彝 仲璋

東天門

連山峭壁入晴空雲鎖重關一徑通倘使登梯臨絕頂也應呼吸接天宮

風陵口渡黃河

萬里黃河水奔濤日夜流岸迴秦地闊波湧華山浮

盛世難為險長途快壯遊愧無祖生志得句付羣鷗

辛卯季冬隨侍 家大人回京曉發新都口占二絕

殘冬復行役曙色惹新詩水動冰凝薄天寒日出遲

霧重翻鴉背霜濃拂馬蹄帝鄉何處是淒切子規啼

白馬山

迤邐登長阪山迴路出沒石梯累百層與僕半思歇山郡饒麥田綠秧細如髮
森森松柏中龍鳳峙高闕古人不可作羣峯猶突兀荒邱一杯土鬱鬱埋忠骨
定軍山下地已作龍蛇窟功名付冥漠生世悲倏忽我來一長嘯高懷凌日月

長卿山

秋雨茂陵人不見青山猶記長卿名西風吹落蕭蕭葉一似長門作賦聲

千佛崖

江流隨山轉青嶂映霞赤寒風迫巨浪蕩漾在空磧回波帶去鷗逝水送歸客
仰視千佛崖藻采煥金碧是誰施斧斤穿鑿荒山石日暮疲津梁嗒然坐永夕
空潭定古心笑我攜雙屐

龍門洞

龍峒何奇險水清石無土兩崖斷復合刻畫成門戶深遠不可測莓苔暗萬古

居人侈神異石燕飛風雨俯視目力窮日影窺亭午洞壑杳冥冥疑是靈仙府
七盤嶺

季冬日漸長落葉聲蕭疏曉登七盤嶺曙色清有餘亂木翳古道炊煙颺晴虛
樵子尋徑入野人傍山居出行未十日跼蹐愁肩輿正賴山水好令我胸膈舒
一覽盡數峯峯峯雲蔚如

石峽關

我從劍門來崎嶇已徧歷路出石峽關秦山又相覲溪迴石露角徑轉峯相敵
鳥道復盤紆層梯緣峭壁僕夫競先登棧馬慣羈勒隔岸是巴山人語異喧寂
百牢關至沔縣途中

百牢關下路石棧尚連雲一水通褒谷千峯接定軍鷗眠沙楮穩鳥帶夕陽曛
極目煙橫處山窮兩岸分

登武侯祠琴臺望侯墓

定軍山色慰忠魂
紅樹依稀掩墓門
龍臥竟成千古恨
馬封猶有一坏存
空階落葉瞻遺像
故壘寒雲列戰屯
寂寂荒臺人已去
撫琴無語到黃昏

雞頭關

曉行陟秦嶺
磴道如旋螺
路窄難並轡
輿僕肩相摩
西風吹遊子
送我山之阿
北去入雲棧
千里盡坡陀
回首視襄城
縈紆帶長河
石雞莫夜啼
屢催行客過

觀音埭懷賈尚書

褒斜五百里
自古稱天獄
行人入山腰
羊腸路屈曲
上窺石壁青
下瞰澄江綠
濤飛欲過耳
石滑難駐足
賈侯昔治道
萬夫飭畚揭
架閣鏟層巖
千里通巴蜀
荔裳摛文藻
作頌詞
屑玉筆力邁
高岑紀功齊
檣輦先民去
已遠百世仰
芳躅
昂首出層雲
衆峯入遙矚

畫眉關

青嶂摩空午不知陰崖峭壁古藤垂東風已動金絲柳何處深山叫畫眉

紫柏山謁留侯廟

紫柏峙中峯蒼崖環古木嗟哉張子房空山事辟穀
決策定戎機捷足得秦鹿忽棄萬戶侯抽身隱巖谷
鳥盡弓必藏此理思爛熟笑爾鯨與彭功成亦烹族
我從襄沔來廟貌瞻穆肅竊嘆名利人往來如轉轂

益門鎮

秦蜀多奇山雲氣朝暮變長途快遊歷百聞證一見
北出益門鎮豁然開生面終南列錦屏渭水澄秋練
回首望襄斜千峯連一綫突兀出雲表向人意戀戀

惜無王與李為我揮霜絹山水有清暉搜羅入詩卷

五丈原

高原樹冷曉霜侵旅客多愁感不禁廣陌紅塵飛鳥沒秋風黃草大星沈已無
戰骨埋荒野空有征輶度遠岑回首陳倉山下路問誰懷古淚沾襟

馬伏波墓

擇木逢真主功高舊史傳壯心悲伏驥老淚灑飛鳶
坏土空埋骨當時孰比肩雲臺留缺典憑弔一潸然

渭橋

東出咸陽城南望長安道曉日在深林微風拂幽草
淺淺濁渭流縱橫似行潦浮柱壓積薪十月繫新造
斷續聞騾鈴白鷺去杲杲回頭視城郭照水影皆倒

聞喜縣懷古三首

郭景純璞

鳳皇不遁耀終有羅網虞君子懷異才每為禍所趨
嗟嗟郭景純淹雅綜羣儒挾術不自祕瓦注喪其軀
不學豪傑士被褐懷瑾瑜徒留葬宅經百世作楷模

裴晉公度

宰相秉萬幾臨事貴能斷巍巍蔡州功非度孰能贊
衆議息紛紜廊廟定神算雄才兼將相累世作貞幹
韓碑與李詩文詞徒炳煥何如桑梓人豐碣標里閭

趙豐公鼎

青萍雖云佳鑒別待薛燭楚邦無卞和不識荆山玉

豐公廊廟器國事信可屬羣小肆異圖大才苦見束
浮雲蔽白日忠蓋遭荼毒耿耿尾箕閒後賢仰遺躅

青玉峽

絕壁高千尺山腰萬樹低飛鷹踰嶺疾疲馬望雲嘶
日炙陰崖裂沙封野徑迷崎嶇行不得愁憶固關西

癸巳二月出都有感

一溪流水抱春城綠樹村前故驛程試看煙橫雲斷處青山依舊送人行

發通州

櫓搖短艇聲聲慢浪作旋渦處處圓兩岸垂楊天接水人家零落白河邊

楊村早行

扁舟侵曉行千里送歸客客子殘夢醒推篷望煙磧

岸閣雲冥冥日出遙空白沙平見遠樹上下水天碧
舟人蒸黃竹清糧煮山石款乃聽一聲布帆過千百

早發黃浦

吳淞一江水相送客舟行遠浦孤帆影寒窗細雨聲

暗潮驚客夢旅思動鐙檠回首京華路春風萬里情

幼弟巧官生於蜀中甲午冬染時疾而亡以詩哭之

荆樹不堪折秋風何太狂弱齡先下世慈母裂中腸

四載真成夢三年已服喪夜臺誰伴汝泉路總茫茫

王江涇

長虹偃蹇臥澄潭十幅征帆破蔚藍樵李城東新漲綠載將春思到江南

鶯脰湖觀浪

舟行過平望乃見鶯脰湖碧浪渺無際風波真可虞
飄然一葉舟放櫂煙水區歸雲追片帆飛渡只須臾
吳江衣帶水春漲連姑蘇推窗偶凝睇四圍如畫圖

陸墓

楊柳東風碧水涯二分春色野人家斜陽粉壁明如畫岸闊沙平數點鴉

晚泊吳江

日落吳江盪夕煙輕舟繫纜石亭前山涵黛色雲初散水定天光塔倒懸甕挹
香齋嘗薄酒杯斟玉茗試新泉長橋直欲為虹去暮雨蕭蕭打畫船

丙申上巳踏青至燒香浜還憩維摩下院同曹仰慈 詒穀作

偶從良友結詩盟散步西郊雨乍晴山色去人時遠近馬蹄聲裏共君行
第一橋連第二橋亭亭畫舸理輕橈山前塘水深如許兩岸垂楊弄影嬌

遊人如織女如雲新樣衣衫鬪十分道是今年春色好淡煙微雨謝東君
儂家小住更為佳放浪風情春水涯遙指祖師山下路酒旗影落踏青鞋
緩步歸來路尚遙菜花風裏問芻蕘殷勤餉我濃茶汁為解靈籤第一條
不識城西路短長行吟恰在水雲鄉三山路上春遊客多少詩篇付錦囊
更向維摩下院來雕欄畫檻映波開他時共話春遊事雲水光中首一回
春城楊柳鎖寒煙燕子來時綠可憐日暮與君謀一醉小樓細雨杏花天

六月朔偕殷君兢 李鈗潘毅遠任飲歸述甫學成新居和毅遠作

遊山有餘興又至故人家入座和風合吟詩好景誇

窗開迎黛色潮落見平沙著雨嵐光活當天樹影遮

賞心香啜茗洗眼飽看花裙屐情同契杯盤禮有加

快浮深盞白醉倚曲欄斜吐屬薰蘭蕙交情說李瓜

領珠君早得鱗甲我堪嗟撫劍聊長嘯爐煙繞畫叉

消寒八詠和潘文佑南 文熊

風吹破紙作鴟鳴雪打疏櫺夜有聲費盡羅文三十幅迎來冬日慰詩情糊窗
斗室西風漸逼人銅鑪獸炭暖如春晚來小酌新醅酒白傅詩懷自率真圍鑪
風雪衝寒有破裘紐針且作補苴謀十年仕宦清如水昨夜新添一段愁補裘
鵲眼新添活水融一窗晴日耐冬烘夜寒容易池冰合珍重緜函付小童藏硯
閒來無事為詩忙新得中山釀酒方斟酌水泉淘秫米麴生風味細評量釀酒
霜露東園菜甲新薑椒芳辣鬱青春先生自在冰壺裏世味酸鹹辨最真醃菜
挑盡寒燈句未安吟肩山聳耐宵寒夜闌應覺詩情溢一字推敲不厭難改詩
清奇濃淡畫中詩展卷沈吟又幾時千樹梅花一天雪小窗幽趣少人知讀畫

贈仰慈

一別五十日又作虞山客握手道行踪同心契蘭石
獻歲聽驪歌送我春風陌吳越三百里望君煙水闊
不見海東雲長天展空碧畫屏夜穴寥把盞又今夕
會面良非難何用溯陳迹三復少陵詩為君且浮白

歸孺人於光緒二十一年二月來歸卒於光緒二十三年七月二十八日
三年伉儷一旦永訣痛何如之

炊白無端噩夢驚夜檐蛇影見分明暫時小別成長恨卒病遲醫實負卿

子應
試赴

杭州歸而孺人病已不起拜跪無兒來左右恩勤有母話平生蓬山路遠書難寄空憶三年結

髮情似窗風冷月華清輾轉中宵睡未成環珮無聲香夢杳衣裳如故暗塵生
殘燈燼後誰憐我宿酒醒時尚憶卿愁聽鄰雞啼喔喔五更初已炯雙睛

寒夜書懷

金鴨香初燼孤燈夜寂寥窗虛人影瘦風勁柝聲驕
為客身多病思家路轉遙枕衾愁不寐誰與話無聊

十一月十一日宿述甫家夢得夜長憎夢短梅冷覺山孤二句以其不倫

易而續成之

羅帳輕綿被孤眠一榻安夜長憎夢短人靜覺燈寒
覓句詩心雜多愁帶眼寬林逋應笑我梅鶴有餘歡

月夜

永夜渾無事情隨步履遙遠山明戍火皓月印河橋
路向前溪轉聲來晚市囂自憐長作客顧影怯涼宵

謁馮定遠墓

綺麗亦詩品先生原可師愛憎人自異瞻拜我非私

骨共虞山朽心惟秋谷知
荒墳留片碣日暮草離離

歲暮書懷

悴葉辭林不復榮感懷往事倍淒清
淚當冰處香猶在夢到甜時恨始平
豈料有緣惟頃刻縱能相見亦來生
錦衾角枕冬之夜誰喻詩人獨旦情

挹辛廬小憩

未見梅花帶雪馨瘦蘆荒草小山亭
憑窗領得蕭疏意乳鴨寒塘破綠萍

和仰慈丁酉除夕述懷之作

駒隙頻驚志士心百年許我託知音
行文可掃千人陣敬業還思一寸陰
白首交情勵金石青衫題詠滿山林
西城風景今猶昔會續詩盟暢素襟

戊戌立春

往日殊堪惜頻年客裏過
雨聲殘臘盡春景上元多

抱病羈吳苑思家激楚歌扁舟歸未得惆悵隔山河

將歸留別虞陽諸子

三年旅食等飄蓬琴水虞山笠屐中有約同謀千日醉思歸又掛一帆風江湖
歲晚人相憶鴻鴈春回訊自通吳唱鷓鴣行不得倚閭何以慰慈衷

精巖寺街晚歸

風吹閣鈴語鐘動梵聲歇暝色集空街人歸踏明月

吳江舟中

輕裝一葉泛扁舟吾谷雲深憶舊遊風雨曉窗人獨坐江湖春漲水東流計程
三日豈云遠作客頻年未解憂我欲排雲尋舊侶蓬萊宮殿小勾留

妾薄命

丈夫似松柏女子絲與蘿託體或非所其如風雨多

良人眷新寵金屋飾綺羅藏嬌誠作樂舊人將奈何
深房宿暗火夜靜轉銀河獨坐不成寐相思淚橫波
負心實男子薄命誰作歌試觀霍小玉請作伐柯柯

晨出

鳩聲呼雨急旭日西山白四顧闕無人小橋流水逆
閒行且復止細草鋪煙碧寂寂閉朱門犬蹲路旁石
香泥雜馬矢知是中郎宅華屋忽山邱臨風慨陳迹

一去

一去瑤臺已渺茫漫尋舊事話荒唐雲橫海島人何在夢到巫山恨又長蓮子
莫猜歡喜字藕絲難斷別離腸異時花底重相見憔悴應羞喚玉郎



郁樸齋詩卷二

秀水 朱辛彝 仲璋

憶蘇臺

光緒癸卯余與李如登泰來沈耆洛濟昌盧澗泉學溥劉龍伯富槐張劼
身文鎬同赴大梁應禮部試道經蘇州留連旬日程期促迫匆匆北上舟
中無事偶憶舊遊因作此詩

雨細風微二月天蘇臺花柳自年年不知客夢增多少無賴春愁上畫船

渡江

江山不改色風雨儘連朝泛泛白鷗沒冥冥春水潮
千峯走吳越一覽失金焦閒話南朝事新愁客裏銷

旅次漢口客舍遣悶

故鄉一別四千里何意此身留漢皋東望白雲飛不盡客愁突比楚山高

廣水道中

長驅一日五百里忽忽不知行路難奇石如人車下立名山隨意眼前看似聞
樵語隔村落欲寫詩篇付羽翰縹渺倘逢仙侶過也應慚愧說驂鸞

途中見杏花

十里東風撲面沙杏花村裏暫停車不辭遠走關山道取次來尋野老家絳雪
亂飄千點碎綠楊為綰一枝斜酒旗何處沽春去賸有囊錢未用賒

遣悶

悶坐慚新婦泥輪濺客衣已嗟行役苦況與寸心違
春草吹還綠遊人遠未歸東風寒徹骨悵望故園扉

自王橋至五溝營

春入淮南路征途上蔡西郊原人迹少風雨雁聲低
柳色碧於染杏花紅滿溪平蕪莽千里何處是隋堤

喜晴

春陰十日雨初晴攬翠林間聽鳥聲煙柳媚人開笑靨嫩寒時節過清明

上巳過屈莊

客裏逢佳節春三上巳辰風塵欺我輩湔洗向河濱
孤憤思投筆儒冠已誤身屈莊楊柳色應笑遠遊人

朱仙鎮

浩浩平沙風起波岳家軍壘贖坡陀九州鐵鑄誰成錯百戰功虧未渡河略地
頻聞回紇馬格天難覓魯陽戈九原可作宗留守翹首龜山恨較多

遊二曾祠登辦香樓望宋故宮

一片晴光下白鷗趙家宮殿俯清流衣冠南渡前朝恨簾幙東風旅客愁秉燭
來游聊結伴辦香誰爇漫登樓春城處處飛花絮獨自憑欄意未休

歸興

一別銷魂易黯然紙鳶風裏暮春天柳陰官路千絲碧麥秀平郊萬頃煙送客
夕陽遲故故懷人舊雨恨綿綿惺忪歸思兼離緒東望江雲路幾千

早行

征途日日苦無情顛倒衣裳拂曉行客夢圓隨車轂轉春愁聞共野花生疏燈
紙帳三更影村店寒雞五夜聲憔悴素顏移帶孔好尋猿鶴故山盟

題陶簪杏同年恩章畫扇

春愁如夢忽經過吟罷新詞喚奈何偏喜風前雙燕子呢喃慰我感情多

與洪伯言錫範同遊普仁寺

寺在常熟北郭
外俗名鐵佛寺

咫尺接城市而無塵世情倚窗偶小坐時聽松濤聲
尚憶歲戊戌結伴山中行參禪宿有約愧我寒舊盟
一別已九載交遊半死生同志得新侶歡言聞鳥鳴

丁未三月在桐鄉觀燈有以獅子燈題徵詩者戲成一律

貧家一飯食不飽富室爭看三月燈絕妙匠心工點綴巧翻花樣翦羅綾馴獅
自愧身無術搏象懸知力未能剩有雙眸光炯炯任他狐兔滿邱陵

秋燕

年年作客計全非閒話萍踪對夕暉掠水有時黏柳絮受風無力拂柴扉故人
乍許營巢穩舊侶相呼結伴歸秋月春花忙裏過何心去傍粉牆飛

新月

一彎新月照柴門疑是冰壺未濯魂花影模糊勾粉壁柳梢隱約辨黃昏誰家

少婦閨中語錯認蛾眉鏡裏痕差喜團藥期已近人間離合不須論

弔秋女士瑾

強欲脫羈絆徒捐七尺軀雄心恥巾幗熱血濺頭顱

違俗宜招禍含冤孰辨誣九原如可作能諒此言無

菱

菱塘秋老綠波晴紫錦紅裳點綴明出水居然露頭角折腰猶自愧平生權歌

湖畔女郎曲詩思江南志士情且喜薦新終有望還將嘉實餉公卿

蟹

問君奚事厲戎裝澤國秋深闢戰場兩岸西風愁夜永三更漁火笑人忙橫行
自詡爭先足躁性誰知有別腸樽俎折衝偏失箸頓教熱血變玄黃

雞冠花

昂藏意氣壓仙班未肯低頭伏草間戴日有心常獨立不教羣卉妬紅顏

胡蝶花

翩躚花影弄朝暉仙骨應披一品衣底事春深不飛去離魂倩女未曾歸

己酉清明大橋村掃墓歸過廟牌看划船遂至孔崑生慶珏家小憩

輕寒十日到清明風雨連朝喜乍晴茅屋炊煙分樹色春田急溜作泉聲隔溪人語划船過掃墓歸舟傍岸行回首夕陽無限好還尋舊友話前盟

九月二十六日自桐鄉歸家

扁舟一葉逐波輕靜坐時聞款乃聲瞥眼秋光來送我關心春夢了無情夕陽紅樹爭顏色野店河橋記路程今夜燈前誰共語桐溪詩景畫難成

庚戌七月朔以事至高家橋遇子辛寶銓蟾伯儒濂計自壬午冬至至今不

到高氏者二十八年矣感懷故舊率成一律

舊游還憶卅年前村樹依稀罩暮煙橋隔東西分子姓舍連南北護公田神交

兩世淡如水旅宿一宵天假緣獨有傷懷無盡處幾番回首倍淒然

嘯梅越泉勤叔皆先君弟

子十年內

相繼去世

中秋

片雲摩盪乍黃昏月色遲遲已到門祇許玉人看永夜那堪香閣照離魂銀燈

燼落魚更轉金鼎煙銷翠被溫一樣中秋度佳節悲歡情緒更誰論

甲寅六月在幣制局偕姚詠白處長傳駒赴奉天道經昌黎城東一山遠

望可愛不知其名以詩紀之

好山石露骨形如荷葉斂曉日浴蒼翠渲染俱入神

縣城似斗大地迫津海濱通衢集行李側耳車鄰鄰

悶坐無一事忘形孰主賓開窗偶憑眺山靈母笑人

山海關

路旁人語雜小車聲班班回首視表木大書山海關
頽垣阻風雨斷續田野間溟渤亦南徙滄桑如循環
王公不設險行旅任往還俯仰感身世我儕何厚顏

同寅徐曙岑行恭過西什庫見廢圃桃花賦詩索和

繁華一轉瞬春色能幾時及時且行樂戚戚徒傷悲
園桃自開落園主人伊誰徐侯素靜者感物動幽思
示我新篇什索我更和詩我心亦無主問君將何辭

檔案庫前海棠盛開同人集詠限東先韻

十分顏色妙天工簇簇名花曲院中錦帳四圍飛紺雨晴雲一樹壓東風睡餘
春思身無力照起濃妝燭更紅知是深閨嬌處子不應牽入綺羅叢

評量身分費詩篇花貌盈盈已待年春夢繁華人未老內家裝束我猶憐聘來
金屋原無價嫁得寒梅不羨仙愛惜紅顏誰草奏綠章夜達九重天

署中籐花盛開戶部街舊署物也賦詩誌之

紫籐花發自年年移植何人記史編舊署今傷堆馬矢

財政部舊署改為
警備司令部駐所

新陰長

好護龍眠紛垂瓔珞階前地綰住韶華劫後天他日羣芳修譜牒合將遺事采
詩篇

白塔寺

遠望見孤塔入門乃無覩梵宮歷幾重疎牖蔽塵土

前院樹豐碑讀云此寺古耗財事浮屠祈福亦何補

覽勝且登高知交偶羣聚長松布庭陰日影已停午

張夏道中

初冬復行役北道入青齊澗水沙成溜山田石作梯曉寒人迹少日出亂峯低

身世慚羈旅吟詩憶舊題

先大夫詩集
亦有此題

題陸賡南樹棠麋研奩填詞圖

五湖煙水富詩情况有圖書擁百城南里舊傳家學遠硯池重見墨花生摩抄
古澤思前輩商略新詞憶美成照眼丹青齊妙手茶餘展對午窗明

雪後入署

老幹猶存傲歲姿小松低壓已難支誰知羣卉彫零日正是天公遊戲時一幅
畫圖新著粉幾層樓閣快吟詩旁人笑我為官拙如此嚴寒到不遲

董博泉溥銘招飲同和居望西山晴雪

高樓敞層軒冷氣撲眉宇啟蟄走春龍玉鱗照玄圃
浮雲不蔽空日軌已亭午掩映生輝光奇觀幸先覩

昔年入關中驛路互三輔南望太白峯去天一尺五
積雪詠陰嶺放吟且懷古此行已卅載往迹付塵土
快意爭目前遠遊亦何取把酒好看山山影適當戶

己未春暮感懷

三月羈囚物外身朝朝有約去尋春關心柳色徒成夢當面花枝也笑人竟日
淹留緣底事吟懷寂寞度良辰園林好景知多少付與東風陌上塵

伯明季易蘭蓀曙丞同至崇效寺看牡丹

京邑多風沙尋春少佳日得閒走城南伴侶亦真率
古寺舊知名牡丹信無匹姚黃與魏紫籤竹書一一
裙屐逞少年相對恆促膝獨憐衆生黑空院自棲逸
老僧豈解事位置倒甲乙問花花不語寂寂維摩室

署中白芍藥盛開

點綴新妝白玉團
舞衣初試怯朝寒
肯將脂粉汗顏色
自有風神倚畫欄
曉鏡乍開雲影亂
霓裳輕拂露華乾
託根莫厭牆東僻
不惹旁人冷眼看

輓朱蓬仙 宗萊

當代論文士君原第一流
六書勤解釋四庫盡探搜

晚作他鄉客長懷沒世憂
此時歸旅櫬涕淚說杭州

夾竹桃

誰家少女拾流霞剪出枝頭一簇花
留得春光常滿眼幾回清影上窗紗

六月十五日偕月姬至十刹海沿河至德勝橋

小別江鄉又一年偶來城北亦欣然
幾灣流水圍新綠疑是金閭郭外田
塵務經心俗慮牽故鄉歸隱更何年
溪頭浣婦勞相望李廣橋邊一惘然

朱峻夫先生六十壽辰徵詩

世家喬木蔭淮南魯殿巍然望蔚藍未識荊州猶有憾每聞禪悅欲同參耆英
集會尊三壽陰德高門頌百男畫錦堂開風日麗幾人繞膝話分甘

先大夫詩集編成自述

卅年手澤重留貽校錄新編數卷詩莊誦如聞庭訓語苦吟猶憶夜寒時秋燈
驛舍尋佳句峭壁天門記獎辭老大無成慚負荷待刊梨棗付諸兒

冬至後二日雨雪成樹介

天地有戾氣風雨乃失常玄冬不飛雪陽氣未蓋藏

昨夜忽嚴冷早起凍欲僵萬事盡縞素兵介森寒芒

災異稽衆說達官懼不祥慨念湘湖間黎庶多死喪

兆民苦塗炭一命豈足償造物有真宰何以懲強梁

贈戴智蘆 正善

謝家羣季總多才玉樹森森傍砌栽刮目新交三日晚印心懷抱一時開詩書有味能相契樗櫟於今愧不材從此春明風雨夜更添良友話岑苔

庚申清明日與月姬遊萬生園

柳色初黃草未青薄晴天氣舊園亭偶逢裙屐曾相識說與家人子細聽

端午日遊太和殿

崔巍宮闕望中天傳世於今幾歷年閭闔千門環禁地東西一道鎖流泉長廊鎮日惟棲鶴庭草依人欲比肩惆悵臨風還小立遑論士貴與王前

晨出

秋來景物自淒清攬入詩思便有情數點雨聲時斷續幾重山色異陰晴中年作客常多病緩步趨衙且早行爽氣撲人無俗慮錦囊佳句苦難成

甯武關行

辛酉三月在三慶園觀余叔岩演甯武關有感作此

周侯去世三百載英姿髣髴今猶在
余生技藝妙擅場舞動劍戟神飛揚
始於別母終殉節先後情形皆真切
觀者臨軒為動容我尤感喟聲嗚咽
有明末葉內亂生羣盜蠹起狐夜鳴
闖王恣飲福祿酒流寇所至無完城
周侯扼守甯武關力戰而死全其貞
凜凜鬚眉照今古偶然相對猶心驚
時局滄桑太容易干戈擾攘成兒戲
武官怕死復要錢黑白倒置天亦醉
余生玩世誠有意若論演劇猶其次

輓勞玉初先生

勞山旅客鬢如絲避世年年自詠詩
獨抱丹心與終古曾逢青眼感相知
半生未遂師承志一紙驚傳訃告辭
嘆息故鄉遺老盡此時南望更傷悲

仲子坪成杰六十初度寄詩祝壽

紫螯初肥菊滿枝懸弧令節最堪思頻年相見渾忘老小別於今又幾時詩詠
南山拈秃筆心懷舊雨感吟髭願君學得長生術棣萼同斟酒一卮

和曙岑三十述懷詩

人生三十始稱壯羨子年華正及時青眼步兵偏自負黑頭諸葛久相期功名
休笑如塵土退食還宜詠素絲九載長安同作客芝蘭臭味有誰知

癸亥春興

春寒遲花信十日東風惡紫陌少遊人緇衣歎京洛
出門偶乘興意緒亦蕭索良友契素心及時且行樂
垂柳拂宮牆新條力猶弱鳴禽弄清香入耳能砭俗
性情貴陶寫自待良不薄踏青倘有約攜手城西郭

五月二十九日與戴偉哉徐曙岑同遊農事試驗場至幽風堂遇雨

急雨催詩興虛堂客思清一池昏水氣萬木助風聲

覓句花間坐忘機物外情苔岑同結契更喜晚峯晴

和孫師鄭蠅塵二律

瑟索官寮似凍蠅拈髭覓句得良朋醇醪自比交情薄濁世何傷口說騰身處
閒曹容我懶天生傲骨少人憎幾回問字尋揚子風雪高齋共一燈

京洛緇衣十載塵偶談聲調便相親車斜韻險詩難和酬唱人多意自伸拔幟
我應慚力薄探驪君已得珠新安排筆硯從今始梅柳衝寒賦早春


題畫

楊柳東風拂面斜江村三月盡飛花十年長作京華客寫到春山便憶家

吾鄉距梅花涇，一衣帶水耳，涇上多績學士，泰半為姻世舊好，朱君仲璋尤吾之畏友也，回憶甲午歲下榻君家，課令弟叔佩令妹采英讀，嘗再度登堂拜見年伯母葉太夫人，君時年甫及冠，從吾姊夏頌老游，晨夕餘暇，輒相與縱論古今，至忘寢饋，如是者有年，始別君去，自後勞燕東西，或閱數年而一見，或十數而不一見，停雲落月，時繞予懷，今秋國難作，君從白下挈眷還，適余來涇上省吾弟壽莊，作數日留，藉與涇上諸故人接慇勤，辱君不棄顧我於讓水軒中，袖所著郁樸齋詩來督序，予亦以新溪人物志相質，正握手道四十年前館粲舊歡，猶彷彿若目前事，然一回相見，老一回矣，微特登拜之禮，不得復修，而頌老暨叔佩且已先後謝人間世，時局滄桑，人生泡影，撫今追昔，感慨係之，又有不能自己於言者，至詩境之妙，當為有目所

共賞，以故不贅述，放糞佛頭，甯比雀頑，亦聊以索涇上梅花共發一笑耳。

丁丑九月世愚弟鄭之章拜撰



語云，文以載道，詩以言志，信已。茲姑舍文而論詩，並卽詩而徵志，獲誦吾仲璋老哥之郁樸齋詩集遺著，不禁嘆樂天自適之志趣，洵堪超越一切，夙乎莫尚者焉；竊嘗披誦古今人士之詩章矣，見乎雍容華貴或忿世嫉俗之傳，以暨跡弛不羈或謹守繩墨之流，縱皆巧運藻思，咳吐珠璣，然寄託原出諸假借，而抒情要率乎天真，斷未有處泰履順者而輒發憤激之詞，亦決無敦品勵行者，而漫擗放浪之句，是故誦其詩卽可覘其志，殊屬百不爽一者也。按郁樸齋詩集，都凡三卷，泰半為與計部同曹唱和之作，旣不以商皇典麗炫其長，復不以怨天尤人訴其遇，斂才就範，不偏不倚，雖非嘯傲烟霞，而胸懷洒脫，逸致盎然，大有吾聞其語如見其人之概；蓋璋哥之生平，素不薰心利祿，一本樂天自適之志趣以行，其知人論世也，絕未作苛刻之評，而涉世

處事也，尤泯絕凌競之念，是以和易近人，一若其詩之平淡無奇，卻味雋而有無窮之雅趣者然，豈非人固以詩傳，而詩復轉以人傳，畢竟人與詩迭為表裏，殆可超越一切而傳之彌遠也哉。特是詩之為藝，不過為璋哥緒餘之長，而可貴者已如斯，其他概可知已。

辛巳夏季義弟申鴻琛拜序於滬江旅次。

有清盛時，小長蘆釣師以詩鳴海內，厥後踵起于樵李者，代不乏人，在昔詠裳姻文，亦以雍容華貴之筆，和其聲，以鳴國家之盛，紅籐館三卷，可覆按也，哲嗣仲璋，以名孝廉出任財部，司公債，敷歷京外，與士大夫唱酬無虛日，詩宗小長蘆，晚歲又一變為香山格律，故其發於聲者，亦華瞻亦淡雅，知其淵源之有自矣，予與仲璋以總角交，聯朱陳誼，尊酒聯吟，垂四十載，迭經離亂，所著半都散失，今秋仲璋歸道山，其長子揆初以英雋才蜚聲商界，星奔南來，於倚廬中，卽搜輯尊甫遺稿付梓，雖不足百篇，亦可窺豹一斑矣，篝燈盥誦，如聞其聲，如見其人，綴詞簡尾，蓋不知涕泗之何從已。

時在庚辰孟冬之月桐鄉徐鈞敬跋



中華民國三十年二月肆日

民國三十年度



國家圖書館



002577392

